

28 APR 1997

P'RAYA KECIL TELUK INTAN -- CALON GERAKAN AKAN DIUMUM 4 MEI, KATA KENG YAIK

TELUK INTAN, 28 April (Bernama) -- Parti Gerakan yang akan mewakili Barisan Nasional (BN) pada Pilihanraya Kecil Kawasan Parlimen Teluk Intan bulan depan telah mengenal pasti calonnya, kata presidennya, Datuk Seri Lim Keng Yaik.

Bagaimanapun katanya nama calon itu belum lagi dikemukakan kepada Perdana Menteri Datu Seri Dr Mahathir Mohamad yang juga Presiden BN.

Katanya Dr Mahathir telah bersetuju Gerakan mewakili BN pada pilihan raya kecil itu kerana kerusi itu sebelum ini dipegang oleh anggota Gerakan Ong Tin Kim yang meninggal dunia pada 10 April lepas.

Dr Lim memberitahu pemberita selepas mempengerusikan mesyuarat jawatankuasa Gerakan bahagian Teluk Intan di sini bahawa nama calon berkenaan telah dipersetujui oleh jawatankuasa tertinggi Gerakan.

Dr Lim yang juga Menteri Perusahaan Utama berkata BN dijangka mengumumkan nama calon itu pada 4 Mei, iaitu dua hari sebelum hari penamaan calon pada 6 Mei.

Katanya pengumuman itu belum diputuskan sama ada akan dibuat oleh Dr Mahathir atau Menteri Besar Perak, Tan Sri Ramli Ngah Talib atau beliau sendiri.

Beliau meramalkan pilihanraya kecil tersebut sebagai pertandingan sengit antara Barisan Nasional dengan DAP jika berlaku pertandingan satu lawan satu. -- BERNAMA

KY WAT